

續
文
獻
通
考

續文獻通考卷之一百二十五

皇明進士雲間王圻纂輯

王禮考 田獵

遼

遼制以十二月辰日前期一日詔司獵官選獵地其日皇帝皇后焚香拜日畢設圍命獵夫張左右翼司獵官奏成列皇帝皇后陞輦敵烈麻都以酒二尊盤殮奉進比南院大王以下進馬及衣皇帝降輿祭東山畢乘馬入圍中皇太子親王率群臣進酒分兩翼而行皇帝始獲兔群臣進酒上壽各賜以酒至中食之次親王大臣各進所獲及酒訖賜群臣飲還宮 應曆元年冬漢遣使

來賀自是歲以爲常儀統和中罷之

太祖九年十月釣魚于鴨綠江 神冊四年正月射虎東山 天贊三年十月征吐渾等部獵寓樂山獲野獸數千以充軍食 十一月射虎于烏刺邪里山抵霸室山 六百餘里且行且獵日有鮮食軍士皆給

太宗天顯三年三月乙卯東蒐癸亥獵殺獬山乙丑獵松山 四月己卯祭鹿鹿神丁亥于獵所縱公私取羽毛革木之材丙申獵三山 五月丙午獵刺索山 四年六月選輕騎數千獵近山 十一月觀漁三义口 七年八月捕鷺于沿柳湖風雨暴至舟覆溺死者六十餘人命存恤其家識以爲戒 八年五月獵獨牛山 九

年正月漁於土河 十年七月獵南赤山 十一年正月釣魚于土河 會同元年正月獵松山 二年三月畋于襄潭之側 十二月釣魚于土河 三年三月獵水門獲白鹿 七月獵猾底烈山 侍中崔窮古言晉主聞陛下數遊獵意請節之上曰朕之遊畋非徒縱樂所以練習武事也乃詔諭之 八年七月獵平地松林穆宗應曆二年九月獵炭山 十一月獵于近郊 三年二月觀漁于神德湖 七年十月獵于七鷹山 八年七月獵于拽刺山 十一年四月射不視朝 十二年秋如黑山赤山射鹿 十三年四月獵于潢河 八月幸近山呼鹿射之旬有七日而後返 十一月獵飲

于虞人家凡四日 十二月射野鹿賜虞人物有差
十四年五月射舐齟鹿于白鷹山至于浹旬十二月
獵于玉山竟月忘返 八月如磴子嶺呼鹿射之獲鹿
四賜虞人女環等物有差遼法廢岐角者惟天子得射
時秋獵善鹿鳴者呼一麋至命夷獵葛射應弦而踣上
大悅賜金銀名馬及抹真地 十五年二月以獲鴨除
鷹坊刺面腰斬之刑 三月虞人沙刺迭偵雁失期加
炮烙鉄梳刑而死 十六年三月庚午獲鴨甲申獲鵞
酣飲達旦 十七年九月自丙戌朔獵于黑山赤山至
于月終 十八年五月獲鴨于述古水野飲終夜 七
月獵獲熊又獵于西京諸山 十九年正月如懷州獵

一獲熊飲醉還宮爲近侍所弑

史臣曰穆宗荒耽于酒畋獵無厭賞罰無章嗜殺不已
變起肘腋宜哉

景宗保寧六年七月獵于平地松林 七年十月釣魚土
河 九年十二月獵于近郊 十年南院樞密使兼政
事令郭襲上書諫田獵曰昔唐高祖好獵以蘇世長諫
罷史稱其美伏念聖祖創業艱難修德布政宵旰不憚
穆宗逞無厭之欲不恤國事天下愁怨陛下繼統海內
翕然望中興之治十餘年間征伐未已而寇賊未除年
穀雖登而瘡痍未服正宜戒謹修省以懷未圖側聞恣
意遊畋萬一有銜縻之變搏噬之虞悔將何及况南有

疆敵伺隙而動聞之得無生心乎伏望陛下節從禽酣
飲之樂爲生靈宗社計則有無疆之休上覽而稱善帝
嘗獵頤山豪猪突駕御者驚避耶律幹獵射而斃之後
獵赤山角鹿突前番犯蹕亦賴幹獵以免 乾亨四年
八月獵于祥古山

聖宗統和元年八月獵赤山遣使薦熊肪鹿脯于慶陵凝
神殿 十一月觀漁撿馬濼 十二月皇太后觀漁于
王盆灣辛丑觀漁于濬淵 二年正月朝皇太后太后
因從觀獵于饒樂川 四年正月觀漁土河 六年十
二月田于沙河 七年五月獵桑乾河 十一月獵于
好草嶺 十二月禁止網捕兔 十年十二月獵儒州

東川 十二年十月獵可汗州之東山 十四年正月
獵于潞河 十一月詔諸軍官毋得非時畋獵妨農
十五年八月獵平地松林 皇太后誠曰欲不可縱萬
一有銜櫟之變適貽予憂其深戒之 十九年十一月
觀漁儒門灤 二十三年十一月觀漁桑乾河 二十
七年正月釣魚土河獵于瑞鹿原 二十九年秋獵于
平地松林 開泰二年七月釣魚曲溝 十月畋庶非
之北 三年正月畋黃河濱壬子帝及皇后獵瑞鹿原
四年正月戊子命詳穩拔姑濬水瑞鹿原以備春蒐
丁酉獵馬蘭淀 八月射鹿秋山至于九月復自癸丑
至辛酉連獵于有栢碎石大保響應松山諸山 五年

五月皇弟南京留守秦晉國王隆慶來朝上親出迎勞
于實德山因同獵于松山 七月獵於赤山 六年十
月獵鏹子河 太平元年二月獵高柳林 七月賜從
獵女直人秋衣是月獵潢河 二年正月如納水釣魚
三年正月如納水釣魚 七月獵赤山 四年二月
獵撻魯河 五年七月獵平地松林 七年四月獵黑
嶺 八年七月獵平地松林

興宗景福元年十一月縱五坊鷹鷂 重熙元年二月大
蒐 四年六月獵于黑嶺 五年九月獵黃花山獲熊
三十六賞獵人有差 六年四月獵野狐嶺 七年四
月獵白馬場 八年七月如混同江觀漁庚戌又漁于

海汶里河 十年九月皇太后射獲熊上進酒爲壽癸
亥上獵馬孟山草木蒙密恐獵者誤射傷人命取律廸
姑各書姓名于矢以志之丙寅以石礮砦太保郭三避
虎不射免官 十三年正月獵兀魯館岡 十五年九
月禁置網捕狐兔 十六年自七月至九月日獵于楚
不溝石塔諸山 十七年閏正月射虎于侯里吉時有
虎奮怒左右辟易陳昭衮捉虎兩耳騎之伺便拔刀殺
虎 十八年正月獵霸特山 十九年七月獵侯里吉
二十一年十月射虎于南撒葛栢 二十三年正月
獵雙子淀又獵盤直坡 四月獵合口忽里 九月獵
遇三虎縱犬獲之 二十四年八月以疾大漸縱五坊

鷹鷂焚釣魚之具

道宗清寧二年四月詔曰方夏長養鳥獸孳育之時不得縱火于郊 四年正月如鴨子河釣魚 七月獵于黑嶺 五年十一月禁獵 七年四月禁吏民畜海東青鶻 咸雍元年七月以皇太后射獲熊賞叅百官有差 十月幸醫巫閭山以皇太后射獲虎大宴群臣令各賦詩 二年正月御安流殿釣魚 四年正月獵炭山 七年獵黑嶺 六年七月獵于合魯搆持 十二月禁漢人捕獵 七年八月以置佛骨于招仙浮圖罷獵禁屠殺 八年閏七月射熊于殺羊山 九年七月獵大熊山 大康元年二月以獲鷲加鷹坊使耶律楊六

爲工部尚書 七月獵平地松林 二年八月獵千秋
山遇麋失其母懷之不射 五年三月以宰相耶律仁
傑得頭鶩加侍中 七月獵夾山 六年四月獵炭山
七月獵沙嶺 九年七月獵馬尾山 九月射熊于
白石山 大安二年七月獵沙嶺 三年七月獵黑山
越日以大雨罷獵 四年十月獵遼水之濱 五年四
月獵北山 七年八月以霖雨罷獵 八年四月獵西
山 七月獵沙嶺 九年四月獵西山 十年七月獵
赤山 壽隆元年七月獵沙嶺 三年七月獵黑嶺
四年四月以雨罷獵

天祚帝乾統二年六月以雨罷獵 七月獵黑嶺時以獵

人多亡嚴立科禁 四年正月獵木嶺 七月獵南山
五年四月射虎炭山 六年獵鹿角山 七年正月
釣魚于鴨子河 十月獵醫坐間山 八年七月以兩
罷釣 九年七月獵于侯里吉 八月雪罷釣 天慶
三年正月獵狗牙山大寒獵人多死 五年七月獵于
特禮嶺東 五年七月獵秋山 七年七月獵秋山
八月獵俄斯那里山 九月獵于山 八年七月獵秋
山 九年七月獵南山 十年秋獵沙嶺 保大元年
七月獵炭山

遼之春獵或于鴨子河或于延芳淀至時侍衛皆服墨
綠色衣各備連鎖鷹食刺鵝雉于河濼周圍相去各五

七步排立皇帝冠巾衣時服繫玉束帶于上風型有驚之處舉旗探騎馳報鳴鼓驚鷺左右皆舉幟麾之皇帝親放海東青鵝搏鷺鷺墜恐鵝力不勝在列者急舉錐刺鷺取其腦飼鵝鵝人例賞銀絹皇帝得頭鷺薦廟群臣各獻酒果舉樂更相酬酢致賀語皆插鷺毛于首以爲樂賜從人酒遍散其毛戈獵網釣春盡乃還

金

太祖收國元年三月獵于寒晦城 九月獵于近郊

熙宗皇統二年正月獵于來流沙 十二月獵于核耶呆

米路 四年九月畋于沙河射虎獲之 十一月獵于

海島三日之間親射五虎獲之 九年十一月獵于忽

刺溫渾山 時右諫議大夫程案上疏畧曰殿前點檢
司古殿巖環衛之士所以肅禁禦尊天子備不虞也臣
幸得近清光從天子觀時田之禮比見陛下校獵凡羽
衛從臣無貴賤皆得執弓矢馳逐而聖駕崎嶇沙磧之
地加之秋木叢鬱易以迷失是日自卯及申百官始出
沙漠獨不知車駕何在瞻望久之始有騎來報皇帝從
數驅已至行在竊惟天子出入警蹕清道而行至于楚
田雲夢漢獵長楊皆大陳兵衛以備非常陛下膺祖宗
付託之重奈何獨與數騎出入林麓沙漠之中前無斥
堠後無羽衛甚非肅禁禦意也臣願陛下熟計之後若
復獵當預戒有司圖上獵地具其可否然後下令清道

而行擇衝要稍平之地爲駐蹕之所簡忠義牙爪之士
統以親信腹心之臣警衛左右俟麋鹿既來然後馳射
仍先遣搜閱林藪明立標幟爲出入之馳道不然後恐
貽宗廟社稷之憂帝嘉納之

海陵天德三年正月上出獵宰相以下辭于近郊上駐馬
戒曰朕不惜高爵厚祿以任汝等比聞事多留滯豈汝
等苟圖目前不以民事自念耶朕將察勤惰以爲賞罰
其各勉之十二月獵于近郊 四年五月獵于立列只
山賜獵士人一羊 八月獵于途爾山 貞元元年八
月禁中都路捕射麋鹿 二年九月獵于近郊乙亥復
獵于近郊 三年九月獵于流沙河親射麋以奉梓宮

十一月獵于近郊 正隆四年十月獵于近郊 六年正月詔自中都至河南府所過州縣調從獵騎士二千 二月禁扈從縱獵擾民 六月次溫湯獵奔鹿突至墮馬嘔血數日

世宗大定三年八月勅殿前都點校唐括德溫重九出獵謂國朝舊俗從人甚寡今扈從軍二千不無擾民可嚴爲約束仍以錢萬貫分賜之 九月獵于近郊 十月十二月如之以所獲薦山陵自是歲以爲常 四年二月獵于高陽之北 十月獵于密陽縣 十一月冬獵 十二月獵于近郊 五年九月秋獵 十二月獵于近郊 六年六月自西京獵于銀山 八月獵于望雲

之南山 八月七月獵三义口諭點檢司曰沿路禾稼
甚佳其扈從人少有蹂踐則當汝罪 九年三月尚書
省定網捕禽獸法或至徒上曰以禽獸之故而抵民以
法是重禽獸而輕民命也自今有犯可杖而釋之 十
年七月獵于柳河川放圍場役夫詔扈從糧食並從官
給又勅扈從人縱畜牧蹂踐禾稼者杖之仍賞其直
十一年十二月冬獵 十二年十一月獵于近郊 二
十二年十二月獵于近郊 二十五年五月平章政事
完顏襄奉御平山等射懷孕兔杖平山三十召襄戒勅
之遂下詔禁射兔 六月獵近山見田隴不治命咎田
者 二十五年十月禁上京等路大雪及含胎時採捕

十一月詔豹未祭獸不許採捕冬月尺雪以上不許用網及速撒海時薛王府掾梁襄諫田獵疏畧曰陛下神武善騎射舉世莫及銜檠之變猛犼之虞姑置勿論設于行獵之際烈風暴至塵埃漲天宿霧四塞跬步不辨以致翠華有敝陵之避襄城之迷百官狼狽于道途衛士叅錯于隊伍當此之時宸衷寧無戒悔臣又聞陛下于合圍之際麋鹿充牣圍中壯而大者纔取數十以奉宗廟餘皆縱之不欲多殺是陛下恩及于禽獸而未及隨駕困斃之臣庶也議者謂前世守文之主生長深宮畏見風日變孫上馬皆所不能志氣銷懦筋力拘柔臨陣戰懼束手就亡陛下監其如此不憚勤身遠幸

金蓮至于松漠名爲坐夏打圍實欲服勞講武臣愚以爲戰不可忘獵不可廢宴安鴆毒不可懷然事貴適中不可過當今過防驕情之患先蹈萬有一危之途何異無病而服藥也況欲習武不必度關涿易雄保順薊之境地廣又平且在邦域之中獵田以時誰曰不可伏乞陛下發如綸之音回北轅之轍塞鷄鳴之路安處中都不復北幸宗社無疆之休天下莫大之願也世宗則嘉納罷之二十九年九月章宗已即位獵于近郊監察御史焦旭劾奏太傳克寧右丞相襄不應請車駕田獵上曰此小事不須治之十二月諭有司女直人及百姓不得用網捕野物亦不得放群鴈枉害物命亦恐女直人

廢射也

革宗明昌元年正月制諸王任外路許遊獵五日過此禁
之仍令戒約人從毋擾民 二月遣諭諸王出獵毋越
本境 二年二月許猛安謀克戶于冬月率所屬戶田
獵二次每出不過十日 丁酉獵于近郊 三年十二
月獵于近郊 五年六月如氷井獵登胡土白山酌酒
再拜曹王永陞以下進酒 七月獵于豁赤火一發貫
雙鹿是日獲鹿二百二十二賜扈從官有差 辛巳次
魯溫合失不是日上親射獲黃羊四百七十一 承安
三年十二月獵于酸棗林大風寒罷獵凍死者五百人
泰和元年正月以方春禁殺含胎兔

宣宗貞祐三年九月以秋稼未獲禁軍官圍獵 元光元年十月獵于近郊詔免百官迎送且勿治道以勞百姓元

太宗五年秋八月獵于必兀思地以阿同葛等充宣差勘事官 九年丁酉春獵于揭揭察哈之澤 冬十月獵于野馬川幸龍庭遂至太祖行宮

憲宗四年甲寅春帝獵于怯蹇义罕夏幸月兒滅怯之地冬大獵于也滅干哈里义海之地忽烈還自大理入覲於獵所 七年五月皇子阿速帶因獵獨騎傷民稼帝見讓之遂撻近侍數人士卒有拔民葱者即斬以徇由是秋毫不敢犯

世祖至元十年詔自今秋獵鹿豕薦太廟 十七年畋近郊每歲如之

成宗大德元年畋于柳林 三年畋于鄴州

武宗至大三年八月甲子獵于昂兀腦兒之地

仁宗皇慶元年詔曰今歲不登民何以堪春蒐其勿令供億是年五月禁諸王母得以農時出獵擾民至十月方許獵

英宗至治元年三月帝畋于柳林 三年二月帝畋于柳林

泰定帝泰定二年正月以畿甸不登罷春畋 三年八月次中都畋于注火察禿之地 致和元年春正月狩

改柳林御史王獻等以歲饑進諫帝曰其禁衛士毋擾民家御史二人巡察之

順帝至元元年春正月帝將畋于柳林御史臺臣諫曰陛下春秋鼎盛宜思付托之重致天下于隆平況今赤縣之民供給繁勞農務方興而馳騁米雪之地倘有銜縻之變柰宗社稷何遂止三年春正月帝獵于柳林凡三十五日監察御史丑的宋紹明進諫帝嘉納之贈以金幣丑的等固辭帝曰昔魏徵諫唐太宗未嘗不賞汝其受之是年七月車駕出獵四年二月庚午帝畋于柳林

皇明

英宗天順二年十月 上校獵南苑苑在京城南二十里
方一百六十里苑中有按鷹臺臺旁有三海皆元之舊
也 本朝闢四門繚以周垣獐鹿雉兔甚多海戶千餘
守視自末樂定都以來歲時蒐獵于此亦所以訓武也
是日 上親御弓矢 命勲戚武將應 詔馳射獲輒
獻之既畢 賜酒饌以所獲分 賜從臣而歸
武宗正德十二年春正月 上獵于南海子

續文獻通考卷之一百二十六

皇明進士雲間王圻纂輯

王禮考 君臣章服

遼

遼初時轉居薦草之間去邃古之風猶未遠也太祖仲父述瀾以遙輦氏于越之官占居潢河沃壤始置城邑爲樹藝桑麻組織之教太祖帝北方太宗制中國紫銀之鼠羅綺之筐襦載而至織麗輿毳被土綢木於是定衣冠之制北從國南從漢各因其便云

祭服 遼以祭山爲大禮服飾尤重大祀皇帝服金文金冠白綾袍紅帶懸魚三山紅垂飾犀玉刀錯絡縫烏

靴 小祀皇帝硬帽紅冠絲龜文袍皇后戴紅帕服絡
縫紅袍懸玉珮雙同心帕絡縫烏靴 臣僚命婦服飾
各從本部旗幟之色

朝服 皇帝服實里薛袞冠絡縫紅袍垂飾犀玉帶錯
絡縫靴謂之國服袞冕太祖即位朝服裏甲以備非常
其後行瑟瑟禮大射柳即此服太宗更以錦袍金帶

臣僚戴檀冠金花爲飾或加珠玉翠毛額後垂金花織
成夾帶中貯髮一總或紗冠制如烏紗帽無簷不襯雙
耳額前綴金花上結紫帶末綴珠服紫窄袍繫鞞帶
以黃紅色條罽革爲之用金玉水晶錠石綴飾爲之盤
紫太宗更以錦袍金帶會同元年群臣高年有爵秩者

皆賜之聖宗統和元年冊承天皇太后給三品以上用漢法服三品以下用大射柳之服

公服 皇帝紫皂幅巾紫窄袍玉束帶或衣紅襖謂之展褻著紫臣僚亦幅巾紫衣興宗重熙二十二年詔八房族巾幘道宗清寧元年詔非勲戚之後及離里重副使并承應有職事人不帶巾

常服 宰相中謝儀帝常服高麗使入見儀臣僚更衣謂之盤褻綠花窄袍綠中單多紅綠色貴者披貂裘以紫色黑色爲貴青次之又有銀鼠尤絮白賤者貂毛羊鼠沙狐裘

田獵服 皇帝幅巾環甲戎裝以貂鼠或鵝頂鴨頭爲

行腰番漢諸司使衣皆左袵黑綠色

以上皆遼人本國服也自大同元年正月朔遼太宗入
晉備法駕受文武百官賀于汴京崇先殿自是以爲常
而北歸後唐晉文物遼皆用之蓋所謂用夏變夷其庶
幾焉此史官所以脩書于冊也今以所用漢服敘于後
祭服 衮冕祭祀宗廟遣上將出征飲至加元服納后
元日受朝則用之金飾垂白珠十二旒以組爲纓色如
其綬黼纁充耳玉簪導玄衣纁裳十二章八章在衣日
月星龍華虫火山宗彝四章在裳藻粉米黼黻衣標領
爲昇龍織成文各爲六等龍山以下每章一行十一白
紗中單黼領青標襪裾黻革帶大帶劍佩綬舄加金飾

元日朝會儀皇帝服衮冕

朝服 乾亨五年聖宗冊承天皇后給三品以上法服
侍中就席解劍脫履重熙五年尊號冊禮皇帝服龍衮
北南臣僚並朝服蓋遼制會同中太后北面臣僚國服
皇帝南面臣僚漢服乾亨以後大禮雖北面三品以上
亦用漢服重熙以後大禮並漢服常朝仍遵會同之制
皇帝通天冠諸祭還及冬至朔日受朝臨軒拜王公元
會冬會服之冠加金博山附蟬十二首施朱翠黑介幘
髮纓翠綉玉若犀簪導絳紗袍白紗中單襦領朱襪裾
白裙襦絳蔽膝白假帶方心曲領其帶革佩劍綬鞬舄
若未加元服則雙童髻空頂黑介幘雙玉導加寶飾元

元日上壽儀皇帝服通天冠絳袍 皇太子遠遊冠謁

廟還宮元日冬至朔日入朝服之三梁冠加金附蟬九
自施珠翠黑介幘髮纓翠綵犀簪導絳紗袍白紗中單
皂領襖襪裾白裙襦白假帶方心曲領絳紗蔽膝其革
帶劍佩綬襪舄與上同後改用白機黑舄未冠則雙童
髻空頂黑介幘雙玉導加寶飾 冊皇太子儀皇太子
冠遠遊服絳紗袍 親王遠遊冠陪祭朝享拜表大事
則服之冠三梁加金附蟬黑介幘青綵導絳紗中單白
紗中單皂領襖裾白裙襦革帶鈎膝假帶曲領方心績
紗蔽膝襪舄佩劍綬二品以上同 諸王遠遊冠三梁
黑介幘青綵 三品以上進賢冠三梁寶飾 五品以

上進賢冠二梁金飾 九品以上進賢冠一梁無飾

七品以上去劍佩綬 八品以下同公服

按遼自皇帝至九品朝服之別如此然二品以上而同于皇太子豈所以重主器哉

公服 皇帝翼善冠朔視朝用之赭黃袍九環帶白練裙六合鞬 皇太子遠遊冠五日常朝元日冬至受朝服絳紗單衣白裙襦革帶金鈎釧假帶方心粉鞞囊白襪烏皮履 一品以下五品以上冠幘纓簪導去粉鞞囊餘並同此

常服 遼謂之穿執起居禮臣僚穿執言穿靴執笏也 皇帝赭黃袍衫折上頭巾九環帶六合鞬非元日冬至

受朝及大祭祀皆用常服 皇太子進德冠九珎金飾
絳紗单衣白裙襦白襪烏皮履 五品以上幘頭亦曰
折上巾紫袍牙笏金玉帶文官佩手巾箋袋刀子礪石
金魚袋武官鞬鞞七事佩刀刀子礪石契苾真噓厥計
筒大石袋烏皮六合靴 六品以下幘頭緋衣木笏銀
帶銀魚袋佩鞞同 八品九品幘頭綠袍鍤石帶鞞同
聖宗開泰七年十一月禁服用明金鏤金貼金 太平五
年二月禁天下服用金及金線

道宗清寧元年詔夷里董及副使之族并民庶不得服馳
尼水獺裘刀柄兔鶻鞍勒佩子不許用犀玉骨突犀惟
大將軍不禁 十年十一月定吏民衣服之制 咸雍

四年十二月詳馳尼水獺裘之禁 太康三年四月禁
士庶服用錦綺日月山龍之文

金

熙宗天眷三年有司以車駕將幸燕京合用通天冠絳紗
袍等據見闕名件依式成造禮服袍裳方巾曲領中單
蔽膝革帶大帶玉具劍綬佩舄襪乘輿服大綬六絲黑
黃赤白縹綠小綬三色同大綬間施三玉環大綬五百
首小綬半之白玉雙佩革帶玉鈎鐶

冕制 天板長一尺六寸廣八寸前高八寸五分後高
九寸五分身圍一尺八寸三分并納言並用青羅為表
紅羅為裏周圍用金縷天板下有四柱四面玕珠網結

子花素墜子前後珠旒共二十四旒各長一尺二寸青
碧線織成天河帶一長一尺二寸濶二寸兩頭各有玕
珠金碧旒三節玉滴子節花紅線組帶二上有真珠金
翠旒玉滴子節花下有金鐸子二枚紅線欵幔帶一黠
纁二真珠垂繫上用金璫子二簪窠欵幔組帶鈿窠四
並玉鏤塵碾造玉簪一頂方二寸導長一尺二寸簪頂
刻鏤塵雲龍

袞 用青羅夾製五采間金繪畫正面日一月一昇龍
四山十二上下襟華蟲各六對虎雉各六對背面星
一昇龍四山十二華蟲各十二對虎雉各六對中單
一白羅單製羅領襖襖裳一帶襖襖紅羅八幅夾製纁

藻三十一粉十六米十六黼三十二黻三十二蔽膝一
帶標襪並紅羅夾製繡昇龍二綬一幅大綬以赤黃黑
白綠標六綠綵織紅羅托裏小綬三色同大綬銷金黃
羅綬頭上施間三王環皆刻雲龍大綬五百首小綬半
之緋白大帶一銷金黃羅帶頭鈿窠二十四紅羅勒帛
一青羅抹帶一玉珮二白玉上中下璜各一半月各二
皆刻雲龍玉滴子各二皆以真珠穿製金篋鈎獸面水
葉環釘涼帶一紅羅裏鏤金上有玉鸞七鉞尾束各一
金攀龍口以玳瑁板襯釘脚舄重底紅羅面白綾托裏
如意頭銷金黃羅緣口玉鼻仁飾以朱韞用緋羅加錦
凡大祭祀加尊號受冊寶則服衮冕行幸齋戒出宮或

御正殿則通天冠絳紗袍

視朝之服 初太宗即位始服 黃自後視百官朝御

袍帶章宗即位以世宗之喪有司請御純吉不從乃

淡黃袍烏犀帶常朝則服小帽紅欄偏帶或束帶

皇太子冠服 冕用白珠九旒紅絲組爲纓青纁充耳

犀簪導袞青衣朱裳五章在衣山龍華蟲火宗彝四章

在裳藻粉采黼黻白紗中單青縹襖裾革帶金銀鈎鐶

蔽膝隨裳色爲火山二章瑜玉雙佩四采織成大綬間

施玉環三白襪朱舄舄加金塗銀釳謁廟則服

遠遊冠 十八梁金塗銀花飾博山附蟬紅絲組爲纓

犀簪導朱明服紅裳白紗中單方心曲領絳紗蔽膝自

襖黑舄餘同袞冕冊寶則服

服飾貴于得中而名亦不可不正天子之冠古稱曰冕而後世有平天通天之名義亦允當乃若太子之冠稱曰遠遊何義哉夫太子雖有撫軍監國之任而當其齒于胄子之時惟習乎禮樂詩書之教謹乎問安視膳之節使德成于恭敬溫文而無忝于元良之望斯可矣遊且不宜况于遠遊乎此名蓋起于魏晉之間而後世承襲不以爲過殆非可同于鯢魚邪蒿之禁者也

臣下朝服 天眷二年三月命百官詳定儀制四月命百官朝參用朝服凡導駕及行大禮文武百官皆服之正一品貂蟬籠巾七梁額花冠貂鼠立筆銀立筆犀簪

導佩劍緋羅大袖緋羅蔽膝各一緋白羅大帶天下樂
暈錦玉環綬一白羅方心曲領白紗中單銀褐勒帛各
一玉珠珮二金塗銀革帶烏皮履白綾幘正二品七梁
冠銀立筆犀簪導不佩劍緋羅大袖雜花暈錦玉環綬
餘並同正四品五梁冠銀立筆犀簪白獅錦銀環綬珠
珮銀革帶御史中丞則獬豸冠青荷蓮綬餘並同正五
品四梁冠簇四金雕銅錦環綬銀珠佩餘並同正六品
至七品三梁冠黃獅錦銅環綬銀珠佩銅束帶餘並同
大定二十二年拾享攝官導駕二品冠七梁三品四品
冠六梁服有金花五品冠五梁六品冠四梁七品冠三
梁監察御史獬豸冠青綬八品九品冠二梁餘製並同

祭服 皇統七年太常寺言太廟成後奉安神三
行禮凡行事執事助祭陪位準古典當服衮冕九章畫
降龍隨品各有等差通典云虞夏殷並十二章日月星
辰山龍華虫作繪于衣宗彛藻火粉米黼黻繡于裳
周升三辰于旂登龍于山登火于宗彛作九章之服山
龍華虫火宗彛繪于衣藻粉米黼黻繡于裳公之服自
衮冕而下如王之服侯伯之服自鷩冕而下如公之服
又後魏帝服衮冕與祭者皆朝服又開元禮一品服九
章又五禮新儀正一品服九旒冕犀簪青衣畫降龍今
沐京舊禮直官言自宣和二年以後一品祭服七旒冕
大袖無龍唐雖服九章服當時司禮少常伯孫茂道言

諸臣之章雖殊然飾龍名衮尊卑相亂請三公服鷩冕
八章爲宜臣等竊謂歷代衣服之制不同若從後魏則
止服朝服或用宋服則爲七章若遵唐九章則有飾龍
名衮尊卑相亂之議尚書省乃奏用後魏故事止用燕
京大冊禮時所服朝服以祭大定三年八月詔遵皇統
制攝官則朝服散官則公服以皇太子爲亞獻服充冕
十四年用唐制若祭遇雨雪則服常服謂今之公服也
泰和元年八月禮官言祭服所以接神朝服所以事君
雖歷代損益不同然未嘗不有分別是以衮冕十二旒
玄衣纁裳 十二章天子之祭服也通天冠絳紗袍紅
羅裳天子之視朝服也臣下之服則用青衣朱裳以祭

朱衣朱裳以朝國朝惟天子備冠冕通天冠三等之服
今群臣但有朝服而祭服尚缺每有祀事但以朝服從
事實于典禮未當請依漢唐故事祭服冕旒畫章然君
臣冕服雖章數各殊而俱飾龍名袞唐孫茂道已有專
卑相亂之論今三公法服有龍恐傷于僭國初禮官亦
嘗駁議乞叅酌古今改置祭服其冠則如朝冠而但去
其貂蟬立筆其服用青衣朱裳白襪朱屨非攝事者則
用朝服庶幾少有差別上曰朝祭之服固宜分也

公服 大定官制文資五品以上官服紫三師三公親
王宰相一品官服大獨科花羅徑不過五寸執政官服
小獨科花羅徑不過三寸二品三品散搭花羅謂無枝

葉者徑不過寸半四品五品服小雜花羅謂花頭碎小者徑不過一寸六品七品服緋芝蔴羅八品九品服綠無紋羅一應武官皆服紫凡散官職事皆從一高上得兼下下不得僭上窄紫亦同服色各依官制品格其諸局分承應人並服無紋素羅十五年制曰袍不加襴非古也遂命文資官公服皆加襴

帶 皇太子王帶佩玉雙魚袋親王王帶佩玉魚一品玉帶佩金魚二品笏頭毬文金帶佩金魚三品四品荔枝或御仙花金帶並佩金魚五品服紫者紅鞵烏犀帶佩金魚服緋者紅鞵烏犀帶佩銀魚服綠者並皂鞵烏犀帶武官一品二品佩帶同三品四品金帶五品六品

七品紅鞵烏犀帶皆不佩魚八品以下並皂鞵烏犀帶
司天太醫內侍教坊服皆同文武官惟不佩魚應殿庭
承應五品以下官非入內不許金帶又展紫入殿庭者
並許服紅鞵不佩魚又二品以上官許兼服通犀帶二
品官若治事及見賓客許兼服花犀帶大定二年制百
官趨朝赴省並須繫帶五品以上官趨朝則朝服赴省
則展皂雨雪沾衣則從便凡朝叅主寶至符展紫御仙
花或太平花金束帶近侍給使供御筆硯直長符寶吏
紫襖子塗金束帶輪直則近侍給使並常服展紫閣門
六尚遇朝叅侍立則服本品服若宮中當直則服窄紫
金帶學士院官修起居注補闕拾遺秘書郎朝叅侍立

則服本品服色帶當真則窄紫金帶東宮左右衛率僕
正副僕正典儀替儀內直郎丞當直亦許服之太子太
師出入宮中則展紫至東宮則展皂三少則展紫

金人常服 四帶巾盤領衣烏皮靴其束帶曰吐鶻巾
之制以皂羅若紗爲之上結方頂折垂于後頂之下際
兩角各綴方羅徑二寸許方羅之下各附帶長六七寸
當橫額之上或爲一縮襍積貴顯者于方頂循十字縫
飾以珠其中必貫以大者謂之頂珠帶旁各絡珠結綬
長半帶垂之海陵賜大興國者是也其衣色多白三品
以皂窄袖盤領縫腋下爲襍積而不缺袴其胷臆肩袖
或飾以金繡其從春水之服則多鶻捕兔羅花卉之

其從秋山之服則以熊鹿爲文其長中骭取便于騎也吐鵲玉爲上金次之犀象骨角又次之鈐周韞小者間置于前大者施于後左右有雙鉞尾紉方束中其刻琢多如春水秋山之飾左佩牌石佩刀刀貴鏤柄尚雞舌木黃黑相半有黑雙距者爲上或三事五事室飾以醬辨樺釧口飾以鮫或屑金鑰和漆塗鮫隙而礪平之醬辨樺者謂樺皮斑文色殷紫如醬中豆辨也產其國故尚之初女直人不得改爲漢姓及學南人裝束違者杖八十編爲永制婦人服襜裙多以黑紫上編繡金枝花周身六辨積上衣謂之團衫用紫黑或皂及紺直領左衽逢掖兩旁復爲雙辨積前拂地後曳地尺餘帶色用

紅黃前雙垂至下齊年老者以皂紗籠髻如巾狀散綴玉鈿于上謂之玉逍遙此乃遼服也金亦襲之許嫁之女則服綽子製如婦人服以紅或銀褐明金爲之對襟衫領前齊拂地後曳五寸餘

書袋制 大定十六年世宗以吏員之服與士民無別潛入民間受賕鬻獄有司不能檢察遂定縣書袋之制省樞密院令譯史用紫紵絲爲之臺六部宗正統軍司檢察司以黑斜皮爲之寺監隨朝諸局并州縣並黃皮爲之各長七寸闊二寸厚半寸並於束帶上懸帶公退則懸于便服違者所司糾之

世宗大定七年六月命地衣龍文者罷之 七月禁服用

金線其織賣者皆抵罪 十二年正月禁百官及承應
人不得服純黃油衣 十三年十一月吏部尚書梁肅
請禁 婢服羅綺上曰近已禁服明金行之以漸可也
且教化之行當自貴近始朕官中服御常自節約舊服
明金者已減大半矣近民間風俗比正隆時聞稍淳儉
卿等當更務儉素使民知所從效也 時太常寺擬士
人及僧尼道女冠有師號并閒官八品以上許服花紗
綾羅絲紬在官承應有出身人帶八品以下官未帶官
亦同許服花紗綾羅紵絲絲紬家屬同婦人許用珠爲
首飾其都孔目與八品閒官同京府州縣司吏皆與庶
人同庶人止許服絲紬絹布毛褐花紗無文素羅絲綿

其頭巾繫腰領帕許用芝蔴羅縹用絨織成者不得以金玉犀象諸寶瑪瑙玻璃之類爲器皿及裝飾刀把鞘并銀裝釘床榻之類婦人首飾不許用珠翠鈿子等物翠毛除許裝飾花環冠子餘外並禁兵卒許服無紋壓繩羅紬絹布毛褐奴婢止許服繩紬絹布毛褐娼優遇迎接公筵承應許暫服繪畫之服其私服與庶人同十五年九月詔親王百官從人所服紅紫改爲黑紫二十年四月制宗室及外戚并一品命婦衣服聽用明金 二十五年五月命尚書省奏事衣窄紫

章宗明昌時上謂宰臣曰今風俗侈靡莫若律以制度使貴賤有等其令禮部具典故以聞他日又謂參知政事

張萬公曰山東風俗如何萬公對以奢左丞守貞因言衣服之制上曰如卿所言正恐失人心耳守貞曰止是商賈有不悅者萬公曰乞寬與之期三年之內當如制于是上以禮部所擬大繁命尚書省再擬行之 六年七月制文武官六貫石以上承應人并及廕者許用牙領紫圓板皂條羅帶皂靴上得兼下係籍書生止服白衫領繫背帶並以紫圓條羅帶皂靴餘人用純紫領不得用緣雜色圓板條羅帶不得用紫靴用黃及黑油皂蠟等婦人各從便泰和四年以親王品官既分領緣而復有皂靴之禁似涉太煩遂聽親王用銀褐領紫緣品官皆紫領白緣餘同明昌制

元

元初立國庶事草創冠服並從舊俗世祖混一天下近取金宋遠法漢唐上而天子冕服皇太子之冠服天子之質孫下而有百官祭服朝服與百官之質孫以及於士庶人之服色秩然有序

世祖至元三年初製太常禮樂工冠服 六年製太常寺祭服 十月定朝儀服色 七年禁繒段織日月龍虎及以龍犀飾馬鞍

仁宗延祐元年詔定官員士庶衣服車輿制度 職官除龍鳳文外一品二品渾金花三品服金荈子四品五品服雲袖帶襴六品七品服六花八品九品服四花職官

散官從一高 繫腰五品以下許用銀并減鐵提控案
牘府州都吏目典吏等檀褐羅窄衫烏犀束帶 諸職
官致仕與見任間解降者依應得品級不敘者與庶人
同 父祖有官既歿年深非犯除名不敘之限其命婦
及子孫與見任同 内外有出考滿應入流見役人貞
服用與九品同授各投下令旨鈞旨有印信見任勾當
人貞亦與九品同 蒙古及見當怯薛人等不在禁限
惟不許服龍鳳文

龍謂五爪
角者

凡服色等第上得兼下下不得僭上違者職官解見任
期年後降一等叙餘人決五十七下違禁之物付告捉
人充實有司究治不嚴從監察御史廉訪司究治御賜

之物不在禁限

英宗至治元年禁服色踰制

天子冕服 制以漆紗上覆白縹青衣朱裏縹之四周
匝以雲龍冠之口圍縹以珍珠縹之前後旒各十二以
珍珠為之縹之左右繫黹纁二繫以玄統承以玉瑱纁
色黃絡以珠冠之周圍珠雲龍綢結通翠柳調珠縹上
橫天河帶一左右至地球鈿窠綢結翠柳珠絲組二屬
諸笄為纓絡以翠柳調珠簪以玉為之橫貫于冠

袞龍服 制以青羅節以生色銷金帝星一日一月一
昇龍四複身龍四山四十八火四十八華蟲四十八虎
雌四十八

裳 制以緋羅其狀如裙飭以文繡凡十六行每行藻
二粉米二黼二黻二

中單 制以白紗絳緣黃勒帛副之

蔽膝 制以緋羅有標緋絹為裏其形如檐袍上着之
繡複身龍

玉佩 珩一琚一瑀一衝牙一璜二衝牙以繫璜珩下
有銀獸面塗以黃金雙璜夾之次又有衝下有衝牙傍
別施雙的以鳴用玉

大帶 制以緋白二色羅合縫為之

玉環綬 制以納石失金錦上有小玉環下有青絲織
網

紅羅襪 制以紅羅為之高勒

履 制以納石失有雙耳二帶鉤飾以珠鞮制以紅綾
右按大常集禮至元十二年十一月博士議擬冕天版
長一尺六寸廣八寸前高八寸五分後高九寸五分身
圍一尺八寸三分并納言青羅為表紅羅為裏周圍緣
以黃金天版下四面珠網結子花素墜子前後共二十
有四旒以珍珠為之青碧線織天河帶二頭各有珍珠
金翠旒三節玉滴子節花全紅線組帶二上有珍珠金
翠旒玉滴子下有金鐸二梅紅繡款幔帶一氈纈二珍
珠垂繫上用金華子二簪窠款幔組帶鈿窠各二內組
帶窠四並鏤玉為之王簪一頂面鏤雲龍衮衣用青羅

六釧五采間金繒日月星辰山龍華蟲宗彝正面日一月一升龍四山十二上下襟華蟲火各六對虎雉各六對背星一升龍四山十二華蟲火十二對虎雉各六對中單用白羅單製羅領標襍裳一帶標襍全紅羅八幅夾造上綢藻粉米黼黻藻三十二粉米十六黼三十二黻三十二蔽膝一帶標紅羅夾追八幅上繡升龍二綬一幅六采織造紅羅托裏小綬三色同大綬銷金黃羅綬頭全上間施三玉環並礪雲龍緋白大帶一銷金黃帶帶頭鈿窠二十有四紅羅勒帛一青羅抹帶一佩二玉上中下璜各一半月各二並礪玉為雲龍文玉滴子各二並珍珠穿造金篋鈎獸面水葉環釧金京帶一紅羅

裏鏤金為之上為王鷲七捷尾束各一金攀龍口玳瑁
襯釘鴛一重底紅羅面白綾托裏如意頭銷金黃羅緣
口玉鼻組飾以珍珠金緋羅錦襪一鞞 大德十一年
九月博士議唐制天子衣冕垂白珠十有二旒以組為
纓色如其綬黻纁充耳玉簪導玄衣纁裳凡十二章八
章在衣日月星辰山龍華蟲火宗彝四章在裳藻粉米
黼黻標領為升龍皆織成之龍章以下每章一行每行
十二白紗中單黼領青襪標裾黻加龍山大三章纁冕
以上火山二章纁冕山一章玄冕無章革帶大帶玉佩
綬襪與上同舄加金飾享廟謁廟及朝遣上將征還飲
至踐祚加元服納后元日受朝及臨軒冊拜王公則服

之又宋制天子服冕廣尺二寸長四寸前後十有二旒
二纁並貫玼珠又有珠旒十二碧鳳翬之在纁外冕板
以龍鱗錦表上綴玉為七星傍施琥珀餅犀各二十四
周綴金絲網鈿以珍珠雜寶玉加紫雲白鶴錦裏四柱
飾以七寶紅綾裏金飾玉簪導紅絲條組帶亦謂之平
天冠衣服青色日月星山龍雉虎雌七章紅裙藻火粉
米黼黻五章紅蔽膝升龍二並織成間以雲彩飾以金
釵花鈿窠裝以珍珠琥珀雜寶玉紅羅襦裙繡五章青
標襪裾六采綬一小綬三結三玉環三素大帶朱裏青
羅四紳帶二繡四紳盤結白帶中單青羅袪帶紅羅勒
帛鹿盧玉具劔玉纁首縷白玉雙佩金飾貫珍珠金龍

鳳革帶紅襪赤舄金釵花四紳玉鼻祭天地宗廟受冊
尊號元日受朝冊皇太子則服之事未果行至英宗朝
命有司製如其式

皇太子冠服

衮冕

玄衣

纁裳

中單

蔽膝

玉佩

大綬

朱鞶

赤舄

按太常集禮至元十二年博士擬衮冕制用白珠九旒
紅絲組為纓青纁充耳犀簪導青衣朱裳九章五章在
衣山龍華蟲火宗彝四章在裳藻粉米黼黻白紗中單
青標襪裾革帶塗金銀鈎黼蔽膝隨裳色火山二章瑜
王雙佩四采織成大綬間施玉環三白鞶朱舄加金塗
銀釵 大德十一年九月詔擬前代服制 唐制皇太

子夏冕垂白珠九旒紅絲組為纓青纁充耳犀簪導玄
衣纁裳九章五章在衣龍山華蟲火宗彛四章在裳藻
粉米黼黻織成之每行一章黼黻重以為等每行九白
紗中單黼領青標襖裙革帶金鈎黼大帶蔽膝隨裳色
火山二章王具釧金寶飾王纁首瑜玉雙佩朱組帶大
綬四采赤白纁紺純朱質長丈八尺首廣九寸小雙綬
長二尺六寸色同大綬而首半之間施玉環三朱韞赤
舄加金飾侍從祭祀及謁廟加元服納妃服之 宋制
皇太子衮冕垂白珠九旒紅絲組為纓青纁充耳犀簪
道青衣朱裳九章五章在衣山龍華蟲火宗彛四章在
裳藻粉米黼黻白紗中單青標襖裙革帶塗金銀鈎黼

蔽膝隨裳衣火山二章瑜玉雙佩四采織成大綬間施
玉環三白韞朱鳥加塗金銀飾加元服從祀受冊謁廟
朝會服之已擬其制未果造

質孫 漢言一色服也內庭大宴則服之冬夏之服不
同然無定制凡勲戚大臣近侍賜則服之下至樂工衛
士習有其服精粗之制上下之別雖不同總謂之質孫
天子質孫 冬之服凡十有一等服納石失怯綿里賁
也則冠金錦暖帽服大紅桃紅紫綠寶里寶里服之則有欄者也
冠七寶重頂冠服紅黃粉皮則冠紅金蒼子暖帽服白
粉皮則冠白金蒼子暖帽服銀鼠皮則冠銀鼠暖帽其
上並加銀鼠比肩夏之服凡十有五等服蒼納都納石

失則冠寶頂金鳳鈸笠服速不都納石失則冠珠子捲
雲冠服納石失則帽亦如之服大紅珠寶里紅毛子答
納則冠珠緣邊鈸笠服白毛子金絲寶里則冠白藤寶
貝帽服馳褐毛子則帽亦如之服大紅綠藍銀褐棗褐
金繡龍五色羅則冠金鳳頂笠笠各隨其服之色服金
龍青羅則冠金鳳頂漆紗冠服珠子褐七寶珠龍荅子
則冠黃牙忽寶貝珠子帶後簷帽服青速夫金絲闌子
則冠七寶漆紗帶後簷帽

速夫細毛
布之精細也

百官質孫 冬之服凡九等大納石失一大紅怯綿里
一大紅官素一桃紅藍綠官素各一紫黃鴉青各一夏
之服凡十有四等素納石失一聚線寶里納石失一棗

褐渾金間絲蛤珠一大紅官素帶寶里一大紅明乘蒼
子一桃紅藍綠銀褐各一高麗鴉青雲袖羅一馳褐茜
紅白毛子各一鴉青官素帶寶里

百官公服之制 制以羅大袖盤領俱右袪一品紫大
獨科花徑五寸二品小獨科花徑三寸三品散蒼花徑
二寸無枝葉四品五品小雜花徑一寸五分六品七品
緋羅小雜花徑一寸八品九品綠羅無文 幘頭漆紗
爲之展其角 笏制以牙上員下方或以銀杏木爲之
偏帶正從一品以玉或花或素二品以花犀三品四
品以黃金爲荔枝五品以下烏犀並八脰 鞵用朱韋
鞵以皂皮爲之

祭服 初憲宗十五年秋八月祭于日月山用冕服自此始成宗大德六年春正月祭于麗正門外丙地命獻官以下諸執事各具公服行禮是時大都未有郊壇大禮用公服自此始九年冬至祭享用冠服依宗廟見用者製其後節次祭祀或合祀天地壇配位從祀獻攝職事續置冠服于法物庫收掌法物二百九十有九公服二百八十窄紫二百九十有五至大間太常博士李之紹王天祐疏陳親祀冕無旒服大裘而加袞裘以黑羊皮為之臣下從祀冠服歷代所尚其製不同集議得依宗廟見用冠服制度

三獻官及司徒大禮使祭服 籠巾貂蟬冠五青羅服

五領袖襖俱用皂綾

紅羅裙五

皂綾爲襖

紅羅蔽膝五

羅花樣俱牡丹

白紗

中單五

黃綾帶

紅組金綬紳五

各佩玉環三

象笏五銀束帶五

玉佩五白羅方心曲領五赤革履五對白綾韞五對

助奠以下諸執事官冠服 貂蟬冠獬豸冠七梁冠六

梁冠五梁冠四梁冠三梁冠二梁冠二百青羅服二百

領袖襖俱用皂綾

紅綾裙二百

皂綾爲襖

紅綾蔽膝二百紫羅公服

二百

用拂花羅

白紗中單二百

黃綾帶

織金綬紳二百銅束帶

二百

紅一百九十八青二各佩銅環二

白羅方心曲領二百銅佩二百

展角幘頭二百塗金荔枝帶三十烏角帶一百七十皂

韞二百對赤革履二百對白綾韞二百對象笏三十銀

杏木笏一百七十

凡獻官諸執事行禮俱依法服惟監祭御史二冠獬豸服青綬凡迎香讀祝及祀日遇陰雨俱衣紫羅公服六品以下皆得借紫

都監庫祠祭局儀鸞局神厨局頭目長行人等冠服交角幘頭五十窄袖紫羅服五十塗金束帶五十皂鞢五十

社稷祭服 青羅袍一百二十三白紗中單一百二十三紅梅花羅裙一百二十三藍織錦銅環綬紳二紅織錦銅環綬紳一百一十七紅織錦玉環綬紳四紅梅花羅蔽膝一百二十三革屨一百二十三白綾鞞一百二十三白羅方心曲領一百二十三黃綾帶一百二十三

佩一百二十三銅珩璜者一百一十九玉珩璜者四藍
素紵絲帶一百二十三銀帶四銅帶一百一十九冠一
百二十三水角簪金梁冠一百七紗冠一十獬豸冠二
籠巾紗冠四木笏一百二十三紫羅公服一百三十三
黑漆幘頭一百二十三展角金二色羅揔領一百二十
三鍍金銅荔枝帶一十角帶一百一十三象笏一十三
枝木笏一百一十枝黃絹單包複一百二十三紫紵絲
抹口青氍毹一百二十三皂鞞一百二十三窄紫羅衫
三十黑漆幘頭三十銅束帶三十黃絹單包複三十皂
鞞三十紫紵絲抹口青氍毹三十

宣聖廟祭服獻官法服七梁冠三鐙鵝青袍三絨錦綬

紳三并銅環方心曲領三藍結帶三銅佩三紅羅裙三白

絹中單三紅羅蔽漆三革履三白絹襪執事備服軟巾唐

巾白欄插領黃鞞角帶皂鞞各九十有八曲阜祭服

連蟬冠四十有三七梁冠三五梁冠三十有六三梁冠

四皂紵絲鞋三十有六鞞舒角幘頭二軟角唐巾四十

角簪四十有三冠纓四十有三副象牙笏七木笏三十

有八玉珮七凡有銅佩三十有六凡帶八十有

五藍鞞帶七紅鞞帶三十有六烏角帶二黃鞞帶烏角

偏帶四十大紅金綬結帶七土用玉環青羅大袖夾衣

七紫羅公服二褐羅大袖衣三十有六白羅衫四十白

絹中單三十有六白紗中單七大紅羅夾蔽膝七大紅

夾裳緋紅羅夾蔽膝三十有六緋紅夾裳四黃羅夾裳三十有六黃羅大帶七白羅方心曲領七紅羅綬帶七黃絹大帶三十有六皂韠白羊毳襪各四十有二對大紅羅鞋七鞞白絹夾襪四十有三鞞

儀衛服色 交角幘頭其制巾後交折其角 鳳翅幘

頭制如唐巾兩角上曲而作雲頭兩旁覆以兩金鳳翅

學士帽如唐巾兩角如匙頭下垂 唐巾制如幘頭

而摘其角兩角上作雲頭 控鶴幘頭制如交角金鏤

其額 花花幘頭制如控鶴幘頭兩角及額上簇象生

雜花 錦帽制以漆紗後幅兩旁前拱而高中下後盡

連錢錦前額作聚文 平巾幘黑漆革爲之形如進賢

冠之籠巾或以青或以白 武弁制以皮加漆 甲騎
冠制以皮加黑漆雌黃爲綠 抹額制以緋羅繡寶花
巾制以純五色畫寶相花 兜鍪制以皮金塗五色
各隨其甲 襯甲制如雲扇青錦質綠以白錦裏以氈
裏以白絹 雲肩制如四垂雲青綠黃羅五色嵌金爲
之 袖襠制如衫 襯袍制用緋錦武士所以褱袖襠
士卒袍制以絹絕繪寶相花 窄袖袍制以羅或以
瓣線襖制如窄袖衫腰作瓣線細摺 控鶴襖制以
青緋二色錦圓荅寶相花 窄袖襖長行與士所服緋
紙色 樂工襖制以緋錦明珠琵琶窄袖細摺 甲覆
膊掩心扞背扞股制以皮或爲虎文獅子文或施金鎧

鎖子文 臂韉制以錦綠絹爲裏有雙帶錦騰蛇束麻
長一丈一尺裏以紅錦 束帶紅鞞雙獺尾黃金銅胯
餘同腰帶而狹小 條環制以銅黃金塗之 汗騰制
以青錦緣以銀褐錦或繡撲獸間以雲氣 行膝以絹
爲之 鞋制以麻 韉鞋制以皮爲履而長其鞞縛于
行膝之內 雲頭韉制以皮幫嵌雲朵頭作雲象鞞束
于脛

庶人服色 除不得服赭黃惟許服暗花紵絛綾羅
毛毳帽笠不許飾用金玉韉不得裁制花樣 諸色目
人除行營帳外餘並與庶人同 諸樂藝人等服與庶
人同凡承應粧扮之物不拘其例 皂隸公使人惟許

服紬絹 此係延祐元年禁例

官民帽簷或圓或前負後方其髮或辮或打紗練惟庶民推髻服用渾金線爲納石失或腰線綉通神欄上下均服

草木子曰紗帽圓領唐服也仕者用之中笠欄衫宋服也中環襪領金服也帽子繫腰元服也庶民用之

后妃命婦以下首飾服章制度

宋理宗紹定三年出封樁庫緡錢二十萬製皇后褱衣

金皇后冠服 花珠冠用威子一青羅表青絹觀金紅羅托裏用九龍四鳳前面大龍銜穗毬一朵前後有珠花各十有二及鴻鵠孔雀雲鶴王母隊仙人浮動插辦等

後有納言上有金蟬鑲金兩博髻以上並用鋪翠酒粉
鏤金裝珍珠結製下有金圈口上用七寶鈿窠後有金
鈿窠二穿紅羅鋪金款幔帶一

祿衣 深青羅織成暈翟之形素質十二等領標襖並
紅羅織成雲龍中單以素青紗製領織成黼形十二標
袖襖織成雲龍並織紅縠造裳八副深青羅織成習文
六等標襖織成紅羅雲龍明金帶腰蔽膝深青羅織成
翟文三等領緣緞色羅織成雲龍明金帶大綬一長五
尺闊一尺黃赤白黑縹綠六彩織成小綬三色同大綬
間七寶鈿窠施三玉環上碾雲龍撚金線織成大小綬
頭紅羅花襯大帶青羅朱履絁其外上以朱錦下以綠

錦紐約用青組撚金線織成帶頭玉佩二朶上中下瑱
各一半月墜子各二並玉碾鏤金打鈸獸面篋鈎佩子
各一水葉子真珠穿綴青衣革帶用鏤金青羅裏造上
用金打鈸水地龍鶩眼蛇尾龍口攀束子共八事以玳
瑁襯金釘脚抹帶二紅羅青羅各一並明金造各長一
丈五寸舄以青羅製白綾裏如意頭明金黃羅準上用
玉鼻仁真珠裝綴繫帶襪青羅表裏綴繫帶

犀冠減撥花樣鏤金裝造上有玉簪一下玳瑁盤一
宗室及外戚并一品命婦衣服 聽用明金世宗二十
年制期親雖別籍女子出嫁並同又五品以上官母妻
許披霞帔惟首飾霞帔領袖腰帶許用明金籠金間金

之類其衣服止用明銀象金及金條壓繡正班局分承應帶官人雖未出職係班其祖母及母妻子孫之婦同籍兄弟之妻及在室女孫姊妹並同又禁私家用純黃帳幕陳設若曾經宣賜鸞輿服御日月雲肩龍文黃服五箇鞞眼之鞍皆須藏之

元后妃及大臣之正室皆帶姑姑衣大袍其次即帶皮帽姑姑高圓二尺許用紅色羅

命婦衣服一品至三品服渾金四品服金荅子六品以下惟服銷金并紗金紗荅子

首飾一品至三品許用金珠寶玉四品五品用金玉珍珠六品以下用金惟耳環用珠玉

同籍不限親疎期親雖刊籍并出嫁同

皇明

庶人許用翠花并金釵各一事惟耳環用金珠碧鈿餘並用銀 娼家出入止服皂褙子亦不得乘坐車馬

天子祭 天地 宗廟及正旦冬至 聖節服袞冕 袞

冕十二章 冕版廣一尺二寸長二尺四寸冠上 覆

玄表朱裏前後各 二旒旒五采玉珠十二玉簪導朱

纓 圭長一尺二寸 玄衣纁裳衣六章織日月星辰

山龍華蟲藻六章織宗彝藻火粉米黼黻 中單以素

紗爲之 紅羅蔽膝上廣一尺下廣二尺長三尺織火

龍山三章 革帶佩玉長二尺三寸 大帶素表朱裏

兩邊用緣上以朱錦下以綠錦 大綬六采用黃白赤

玄纁綠織成純玄質五百首 小綬三色同大綬間織
三玉環 朱襪赤舄 大明集禮載祭社稷先農 冊
拜皆服衮冕

朔望視朝降 詔降香進表四夷朝貢朝覲服皮弁服
其皮弁用烏紗冒之前後各十二縫每縫中綴五采
玉十二以爲飾玉簪導紅組纓其服絳紗衣蔽膝隨衣
色白玉佩革帶玉

天子常服 烏紗折角向上巾盤領窄袖袍束帶間用
全玉琥珀透犀

皇后受冊謁 廟朝會服禮服 冠爲圓匡冒以翡翠
上飾以九龍四鳳大花十二樹小花如大花之數兩傍

髻二鈿服褱衣深青爲質畫翟赤質五色十二等素紗中單黼領朱羅縠褱襖裾蔽膝隨裳色以緞爲領綠用翟爲章三等大帶隨衣色朱裏紕其外上以朱錦下以綠錦鈕約用青組玉革帶青襪青舄以金飾

皇后燕居服常服雙鳳翊龍冠首飾釧鐲金玉珠寶翡翠隨用諸色圓衫金繡龍鳳帶用金玉 洪武四年定常服龍鳳珠翠冠真紅大袖衣霞帔紅羅長裙紅褶子冠制如特髻上加龍鳳飾衣用織金龍鳳文加繡飾皇妃冠服 冠飾以九翟四鳳花釵九樹小花如大花之數兩傳髻九鈿翟衣青質編次於衣及裳重爲九等青紗中單黼領朱縠褱襖裾蔽膝隨裳色加文繡重雉

爲章二等以緞爲領緣大帶隨衣色玉革帶青襪烏佩
綬凡受冊助祭朝會則服之

皇妃常服 鸞鳳冠首飾釧鐲用金玉珠寶翠諸色團
衫金繡鸞鳳不用黃帶用金玉犀燕居則服之 洪武
四年定常服山松特髻假髻花鈿或花釵鳳冠真紅大
袖衣霞帔紅羅裙紅羅褙子衣用織金及繡鳳文 東
宮妃 王妃同 五年定內命婦三品以上用花釵翟
衣四品五品用山松特髻大衫爲禮服貴人視三品以
后妃燕居冠及大衫霞帔爲禮服味羣慶雲冠鞠衣
褙子緣襖襖裙爲常服

東宮冠服凡陪祀天地宗廟正旦冬至朝賀服衮冕

袞冕九章 冕九旒旒九玉金簪導紅組纓兩玉璫
圭長九寸五分 玄衣纁裳衣五章織山龍華蟲宗彝
火裳四章織藻粉米黼黻 白紗中單黼領 蔽膝隨
裳色織火山二章 革帶金鈎鑲玉佩 綬五采用赤
白玄纁綠織成純赤質三百三十首小綬三色同大綬
間織三玉環 大帶白表朱裏上緣以綠 白襪赤舄
大明集禮載 皇太子從祭社稷及受 冊納妃皆
服前袞冕

皇太子朔望朝降 詔降香進表四夷朝貢朝覲服皮
弁服 皮弁用烏紗冒之前後各九縫每縫中綴五采
王九金簪朱纓玉圭絳紗袍紅裳素白中單蔽膝隨裳

色玉佩大帶大綬襪烏

皇太子常服 洪武元年定常服烏紗折上巾

東宮妃受冊助祭朝會服禮服 冠飾以九鸞四鳳花
欽九樹小花如大花之數兩博鬢九鈿翟衣青質繡翟
編次于衣及裳重爲九等青紗中單黼領朱紱標襪裙
蔽膝隨裳色以緞爲領緣加文繡重雉爲章二等太帶
隨衣色青襪烏佩綬

東宮妃常服 犀冠刻以花鳳首飾釧鐲用金玉珠寶
翠諸色團領衫金繡鸞鳳惟不用黃帶用金玉犀燕尾
則服之

親王助祭謁 廟正旦冬至等朝賀服袞冕 袞冕九

大紅素羅裳及蔽膝大紅素羅白素紗二色夾帶玉朝帶丹礬紅花錦錦雞綬玉佩象牙笏白絹襪皂皮雲頭履鞋

長子公服 皂皺紗幘頭大紅素紵絲衣玉韋帶

長子常服 烏紗帽大紅紵絲織金獅子開襟圓領玉束帶皂皮銅線靴

長子夫人冠服 珠翠五翟冠大紅紵絲大衫深青紵絲金繡翟雞帟子青羅金繡翟雞霞帔金墜頭

鎮國將軍冠服與長子同 鎮國將軍夫人冠服與長子夫人同 輔國將軍冠服與鎮國將軍同惟冠六梁帶用犀 輔國將軍夫人冠服與鎮國將軍夫人同惟

冠用四翟抹金銀墜頭 奉國將軍冠服與輔國將軍
同惟冠五梁帶用金釵花常服太紅織金虎豹 奉國
將軍淑人冠服與輔國將軍夫人同惟翟子霞帔金繡
孔雀文 鎮國中尉冠服與奉國將軍同惟冠四梁帶
用素金佩用藥玉 鎮國中尉恭人冠服與奉國將軍
淑人同 輔國中尉冠服與鎮國中尉同惟冠三梁帶
用銀釵花綬用盤雕公服用深青素羅常服紅織金熊
羆 輔國中尉宜人冠服與鎮國中尉恭人同惟冠用
三翟翟子霞帔金繡鴛鴦文銀墜頭 奉國中尉冠服
與輔國中尉同惟冠二梁帶用素銀綬用練鵲幘頭黑
漆常服紅織金彪 奉國中尉安人冠服與輔國中尉

宜人同惟大衫用丹縐紅褶子霞帔金繡練鵲文
縣主冠服珠翠五翟冠大紅紵絲大衫深青紵絲金繡
孔雀褶子青羅金繡孔雀霞帔珠金銀墜頭 郡君冠
服與縣主同惟冠用四翟褶子霞帔金繡鴛鴦文 縣
君冠服與郡君同惟冠用三翟 鄉君冠服與縣君同
惟大衫用丹碧紅褶子霞帔金繡練鵲

文武官員朝服 梁冠赤羅衣白紗中單俱用青飾領
緣赤羅裳青綠赤羅蔽膝大帶用赤白二色絹革帶佩
綬白襪黑履一品至九品俱以冠上梁數分等第

公冠八梁加籠巾貂蟬立筆五折四柱香草五段前後
用玉爲蟬 侯冠七梁加籠巾貂蟬立筆四折四柱香

草四段前後用金爲蟬 伯冠七梁加籠巾貂蟬立筆
二折四柱香草二段前後玳瑁爲蟬俱左插雉尾
駙馬冠與侯同不用雉尾

一品冠七梁不用籠巾貂蟬革帶與佩俱用玉綬用綠
黃赤紫四色絲織成雲鳳四色花錦下結青絲網綬環
二用玉笏用象牙 二品冠六梁革帶綬環用犀餘同
一品 三品冠五梁革帶用金佩用玉綬用黃綠赤紫
四色織成雲鶴花錦下結青絲網綬環二用金笏用象
牙 四品冠四梁革帶用金佩用藥玉餘同 五品冠
三梁革帶用銀釵花綬用黃綠赤紫四色盤雕花錦下
結青絲網綬環二用銀鍍金笏用象牙 六品七品冠

二梁御史加解豸革帶用銀佩用藥玉綬用黃綠赤三色絲織成練鵲花錦下結青絲網綬環二用銀笏用槐木 八品九品冠一梁革帶用烏角佩用藥玉綬用黃綠二色絲織成鸛鵲花錦下結青絲網綬環三用銅笏用槐木

右朝服于 大祀慶成正旦冬至 聖節及頒降開讀 詔赦進表 制則服之

雜職等官 洪武三十年奏准凡遇大朝賀等禮亦照九品官具朝服行禮

文武官員公服 用盤領右衽袍或紵絲紗羅絹從宜製造袖寬三尺 一品至四品緋袍 五品至七品青

袍 八品至九品綠袍 未入流雜職官袍笏帶與八品以下同

公服花樣 一品用大獨科花徑五寸 二品用小獨科花徑三寸 三品散搭花無枝葉徑二寸 四品五品小雜花紋徑一寸五分 六品七品小雜花徑一寸 八品以下無紋

幞頭用漆紗二等展角各長一尺一寸其雜職官負幞頭用垂帶

笏依朝服爲之

腰帶 一品用玉或花或素 二品用犀 三品四品用金荔枝 五品以下用烏角鞋用青革仍垂撻尾干

下韉用皂

右公服在京文武官于每日早晚朝奏事及侍班謝恩見辭則服之在外文武官負于每日清早公座服之

凡各處雜職未入流品人負若遇大朝賀進表等陪班行禮止用公服

公侯駙馬伯公服 洪武二十四年定服色花樣腰帶與一品同 文武官公服花樣如無從織買用素隨宜朝服公服制度内外文武官同其公服武官應直守衛者不拘此服 二十六年令常朝止穿便服若遇朝望具公服朝參内外未入流雜職官幞頭展角與入流官

同不用垂帶

文武官員祭服 文武官陪祭一品至九品青羅衣白

紗中單俱用皂領綠赤羅裳皂緣赤羅蔽膝方心曲領

其冠帶佩綬等第並同朝服 洪武六年定品官家用

祭服三品以上去方心曲領四品以下并去佩綬 二

十九年今在外未入流官陪祭俱用祭服與九品同

文武官員常服用雜色紵絲綾羅綵繡庶民止用紬絹

紗布不許別用花樣 公侯駙馬伯麒麟白澤 文官

一品二品仙鶴錦雞 三品四品孔雀雲鴈 五品白

鵬 六品七品鷺鷥鴻鴻 八品九品黃鸝鶴鸛練鵲

風憲官用獬豸 武官一品二品獅子 三品四品

虎豹 五品熊羆 六品七品彪 八品九品海馬犀

牛

凡官員及軍民僧道人等衣服帳幔並不許玄黃紫三色并織繡龍鳳文違者罪及染造之人其朝見人負四時並用顏色衣服不許純素

洪武禮制 凡各處雜職未入流品人員若遇朝賀進表箋陪班行禮止用烏紗帽紅團領衫黑角束帶 凡文武官常朝視事以烏紗帽團領衫束帶爲公服一品玉帶二品花犀帶三品金級花帶四品素金帶五品銀級花帶六品七品素銀帶八品九品烏角帶 凡年老致仕及侍親辭閒官員許用紗帽束帶若爲事黜降者

服與庶人同 洪武三年令百官服色準所授散官不
許見任之職 二十二年令文武官除本等紗帽外過
雨雪許戴兩帽公差出外許帶帽子入城不許其公差
人負出外者亦如之 二十三年令官負人等衣服寬
窄以身為度文職官衣長自領至裔去地一寸袖長過
手復回至肘袖襖廣一尺袖口九寸公侯駙馬與文職
官同武職官衣長去地五寸袖長過手七寸袖襖廣一
尺袖口僅出拳 二十四年定公侯駙馬伯束帶與一
品同雜職未入流官與八品九品同 三十年令致仕
官服色與見任同若遇朝賀及謝 恩見辭一體具服
行禮 景泰四年令錦衣衛指揮侍衛者得衣麒麟服

色 天順二年令官民人等衣服不得用蟒龍飛魚斗
牛大鵬象生獅子四寶相花大西番蓮大雲花樣及姜
黃柳黃明黃玄綠等色 儀賓凡朝服公服常服俱照
品級與文武官同惟笏皆用象牙常服花樣視武官
嘉靖七年 勅製忠靜冠服許在京七品以上翰林國
學行人在外方面府州縣正學官武職都督以上服之
教坊司官冠服 洪武間令教坊司官常服冠帶與百
官同至 御前供奉執粉漆笏服黑漆幘頭綠羅大袖
襴袍黑角偏帶皂靴

命婦冠服禮服 一品冠用金事件珠翟五箇珠牡丹
開頭二箇珠半開三箇翠雲二十四片翠牡丹葉一十

八片翠口圈一副上帶金寶鈿花八箇金翟二箇口銜
珠結二箇 二品至四品冠用金事件珠翟四箇珠牡
丹開頭二箇珠半開四箇翠雲二十四片翠牡丹葉一
十八片翠口圈一副上帶金寶鈿花八箇金翟二箇口
銜珠結二箇 一品至四品霞帔褙子用雲霞文釵花
金墜子 五品至六品冠用抹金銀事件珠翟三箇珠
牡丹開頭二箇珠半開五箇翠雲二十四片翠牡丹葉
一十八片翠口圈一副上帶抹金銀寶鈿花八箇抹金
銀翟二箇 銜珠結子二箇霞帔用雲霞文 五品鑲
金釵花銀墜子 六品釵花銀墜子 七品至九品冠
用抹金銀事件珠翟二箇珠月桂開頭二箇珠半開六

箇翠雲二十四片翠月桂葉一十八片翠口圈一副上帶抹金銀寶鈿花八箇抹金銀翟二箇口銜珠結子二箇七品霞帔褙子與八品同八品九品霞帔同繡纏枝花墜子與七品同褙子繡枝團花洪武五年定命婦團衫之制以紅羅爲之繡重雉爲等第一品九等二品八等三品七等四品六等五品五等六品四等七品三等其餘不用繡雉二十四年定命婦冠服公侯伯與一品同大神衫用真紅色一品至五品紵絲綾羅隨用六品至九品綾羅紬絹隨用霞帔褙子皆用深青段匹公侯及一品至二品金繡雲霞翟文三品四品金繡雲霞孔雀文五品繡雲霞鴛鴦文六品七品繡雲霞

練鵲文 命婦入內朝見 君后在家見舅姑并夫及
祭祀則服之 大袖衫領闊三寸兩領直下一尺間綴
紐子三前身長四尺一寸二分後身長五尺一寸內九
寸八分行則摺起末綴紐子二紐在掩紐之下拜則放
之袖長三尺二寸二分根闊一尺口闊三尺五分落摺
一尺一寸五分掩紐二就用衫料連尖長二寸七分闊
二寸五分各于領下一尺六寸九分處綴之于掩下各
綴紐門一以紐住摺起後身之餘者撓子亦用初料兩
塊斜裁上尖下平連尖長一尺六寸三分每塊下平處
各闊一尺五分縫合于領下一尺七分處綴之上綴尖
皆縫合以藏霞帔後垂之末者霞帔二條各長五尺七

寸闊三寸二分各繡禽七隨品級用前四後三各繡臨
末左右取尖長二寸七分前後分垂橫綴青羅攢子牽
聯並之前垂三尺三寸五分尖綴墜子一後垂二尺三
寸五分臨末插毳子內藏之墜子中釵花禽一四面雲
霞文禽如霞帔隨品級用笏以象牙爲之團首方脚長
六寸四分闊一寸五分厚一分五厘

命婦常服 洪武二十四年定命婦用顏色圓領衫

進士巾服 洪武初定進士巾如今烏紗帽之製頂微
平展角闊寸餘長五寸許系以垂帶皂紗爲之深色藍
羅袍緣以青羅袖廣而不殺革帶青鞋飾以黑角垂捷
尾于後笏用槐木 廷試後赴國子監領出傳臚日服

之至上表謝 恩後謁 先師孔子行釋菜禮畢始易
常服其巾袍等仍送國子監友納

狀元冠服 朝冠二梁緋羅爲之圓領白絹中單錦綬
蔽膝金槐笏一把紗帽一頂光素銀帶一條藥玉佩一
副朝靴毳襪各一雙俱在內禮部官引至 御前頒賜

上表謝 恩日服之

生負巾服 洪武二十四年定生負襴衫用玉色布絹
爲寬袖皂緣皂條軟巾垂帶

吏負巾服 洪武四年定各衙門掾吏令史書吏司吏
典吏穿皂盤領衫繫絲條戴四方平定巾 十四年命
吏員皂衣改用青色 三十年令令史典吏皆服皂衣

巾樣不與喪民同

士庶巾服公使人等附

士庶初戴四帶巾令改四方

平定巾維色盤領衣不用黃執仗之士首服鏤金額交
脚幘頭服諸色辟邪寶相花裙襖銅葵花束帶皂紋靴
刻期冠方頂巾衣胸背鷹鷄花腰線襖子諸色闊絲匾
條象牙雕衣環行膝八帶鞋皂隸冠圓頂巾衣皂衣

洪武三年令庶民男女衣服並不得僭用金繡錦綺紵
絲綾羅許用紬絹素紗其首飾釧鐲並不許用金玉珠
翠止用銀鞋不得裁製花樣金線鞋飾 四年令皂隸
公使人穿皂盤衫戴平頂巾繫白裙腰帶錫牌 六年
令庶民巾環不得用金玉瑪瑙珊瑚琥珀未入流品者

並同庶民帽不得用頂帽珠許用水晶香木校尉質孫
束帶幘頭靴鞋刻期雕刻雜花象牙條環外餘同庶民
十四年令農民之家許穿紬紗絹布商賈之家止許
穿絹布如農民之家但有一人爲商賈者亦不許穿紬
紗校尉用金鵝帽黑漆鍍金荔枝改作銅釘釐每五
釘攢就四面稍起邊欄鞋用青紫束之各衙門祇禁
原穿皂衣改用淡青凡僧道服色裨僧茶褐常服青
條玉色袈裟講僧玉色常服綠條淺紅袈裟教僧皂常
服黑條淺紅袈裟僧官皆如之道士常服青法服朝服
皆用赤色道官亦如之惟僧錄司官袈裟道錄司官法
服朝服皆綠紋飾以金二十二年令將軍力士尉

旗軍常戴頭巾或毡腦官下舍人并儒士吏貢民人等
常戴本等頭巾鄉村農夫許戴斗笠蒲笠出入市井不
禁不親農業者不許 二十三年今若民儒士生貢衣
制同文職惟袖長過手復回不及肘三寸庶民衣長去
地五寸袖長過手六寸袖椿廣一尺袖口五寸軍人衣
長去地七寸袖長過手五寸袖椿廣不過一尺窄不過
七寸袖口僅出拳 二十五年今文武官貢同籍父兄
伯叔弟姪子婿及儒士生貢吏典知印承差欽天監天
文生太醫院醫士瑜珈僧正一道士將軍散騎舍人帶
刀之人正伍馬軍并馬軍小旗教讀 大誥師生許穿
靴校尉力士遇上直許穿出外不許其庶民商賈技藝

步軍及軍下餘丁管步軍總小旗官下家人火者皂隸
伴當在外醫卜陰陽人皆不許止許穿皮扎鞦其北平
及山西山東陝西河南并直隸徐州地寒人民許穿牛
皮直縫靴 二十六年禁官民步卒人等不許服對襟
衣惟騎士不拘

士庶妻冠服婢使人等附 士庶妻首飾許用銀鍍金

耳環用金珠釧鐲用銀服淺色團衫許用紵絲綾羅紬
絹 洪武五年令凡民間婦人禮服惟用紫染色絕不
用金繡凡婦女袍衫止用紫綠桃紅及諸淺淡顏色不
許用大紅鴉青黃色帶用藍絹布凡女子在室者服飾
之高頂髻用絹布袂領長襖長裙小婢使綰雙髻用長

短衣長裙 成化十年禁官民人等婦女不許僭用
渾金衣服寶石首飾

樂人巾服 樂藝冠青卍字頂巾繫紅綠搭膊樂妓則
戴明角冠皂褙子不許與庶民妻同 洪武十二年令
教坊司伶人常服綠色巾以別士庶之服十四年令樂
人戴鼓吹冠不川錦綉惟用紅搭膊服色不拘紅綠
二十一年令教坊司婦人不許戴冠穿褙子 二十五
年令樂工當承應許穿靴出外不許 三十年令樂人
衣服許用明綠桃紅玉色水紅茶褐顏色其餘不得穿
用併色長樂工俱戴皂頭巾繫雜色條

御前供奉俳長皆服鼓吹冠紅羅胸背小袖袍紅綳褙

膊皂靴 色長皆服鼓吹冠紅青綠紵絲衫畫百花袍
紅絹褙膊 歌工皆服弁冠紅羅織錦胸背大袖袍紅
生絹錦領中單黑角束帶紅熟絹錦脚袴皂皮琴鞋白
綿布夾襪 樂工服色與歌工同

中宮供奉女樂奉鑾等官妻本色髻髻青羅圓領 提
調女樂服黑漆唐巾大紅羅鋪金花圓領鍍金花帶皂
靴 歌童女樂服黑漆唐巾大紅羅鋪金裙襖胸帶大
羅抹額青綠羅衫畫雲肩描金牡丹花皂靴 奏樂女
樂服色與歌童同